

Cantaremu a vita

Dice lu fiume rossu
Quant'ellu corre l'oddiu
In stu mondu turnatu
Carnaghju è scimità
Pè qualchi Diu cioncu
O affare di soldu
Un vale più nè vita
Nemmancu umanità

L'omi turnati bestie
Animali carnaghji
Ridenu à vede more
Una donna, un zitellu
Scalanu ste rubbacce
Nant'a i nostri rinaghji
A toglie vite
Impunendu macellu

E li stati imputenti
Cun discorsi vigliacchi
Palesanu, O vergogna
Orgogliu e dibbulezza
Cantu d'ipucrisia
Tale un ghjocu di scacchi
Vite sacrificate
A putere e ricchezza

Volenu a sapemu
Accatizza paure
Tra l'omi e le culture
Alza tante muraglie
Nutrisce l'ira viva
Nutrisce le sciagure
E fa nasce
E guerre, le battaglie

Site maladetti
Purcacci à cor'di morte
Chi vulete in stu mondu
Spinghje le mente d'oru
Più purtarete bughju
Più luce serà forte
Chi site pochi è micca
Di pettu à un tisoru

Ci purtarete l'oddiu
Vi cantaremu amore
Purtarete lu neru
Vi saremu culore
Purtarete tristezza
Saremu gioia viva
Purtarete la morte
Cantaremu a vita

Purtarete tristezza
Saremu gioia viva
Purtarete la morte
Vi cantaremu a vita.